

Ya'a tse'e je mutoojk nak juu' ve'e je Juan jyaay

Ku je Juan dunuja'yi je Gayo

¹Ats, je maj ónuk, to'k juu' ve'e je jaanchja'vivatajk dunuvinténip, máyam ats mitse'e je Dios ntuknukex, mits, Gayo, juu' atse'e ooy ntuntsajkp.

²Nnuntsapkajtspts ats mitse'e jetse'e nujom kajx m'óyat jetse'e mákatsots m'ijtnit, ve'em ax jo'n atse'e nnujava jets oye'e je mjoot je mja'vin y'it jeja je Nte'yam vyinkujk. ³Ooy atse'e ntuntukxoojntk ku ve'e jye'ydi je utsta je ajchta jets atse'e xnuujmidi vintso ve'e to'k aaj to'k joot mnaajk'ítju je tyuv je'e maát, ve'em ax jo'n xa'ma kajx mnaajk'ítju je tyuv je'e maát. ⁴Ooy xa atse'e ntuntukxoonduk ku atse'e nmo'tu jets je'eda pan pan jaty atse'e n'onukja'vidup, naajk'ijtjudupts je'e ve'e je tyuv je'e maát. Ka'a tse'e ti viijnk juu' atse'e ve'em ntukxoojntkp.

Ku je Gayo yak'oñukojtsi

⁵Mits, juu' atse'e ooy ntuntsajkp, oys je'e ve'e juu' mitse'e mtuump, je'ets je'e ve'e vintso ve'e xputaka je utsta je ajchta maát je utsta

je tsa'ada, je'e ve'e vinkopk juu' ve'e je'yva jayu. ⁶Je utsta je ajchta juu' ve'e ve'nidup mits maát, je'e tse'e dunukojtstu jeja je jaanchja'viva vyinkujk vintso mits je'e ve'e xputajkidi. Ku tse'e ñajxtinuvat jem tsov, putaka je'eda to'k aaj jetse'e xmo'odat juu' ve'e y'ajootadap too' aajy, ve'emele xtónut ax jo'n je Nte'yam du'oyjávat. ⁷Je'e tse'e tsoo'ndu jetse'e je jayu duvaajnjada je Cristo je y'ayook. Ka'a tse'e du'amótudi pan pan jatye'e je Nte'yam dukal'ixada jetse'e pyutákajadat, je'e kajx tse'e nuyojk vinkopk jetse'e xputákadat. ⁸Xtukkaadaakumdup xa uu'me'e jets je'e ve'e mputajkimdat, ve'em tse'e ntukmaátmuto'numdat ntukmaátmupajkumdat je Nte'yam ku ve'e du'avánada je tyuv je'e.

**Vintso je Diótrefes dukakuvujk
je Nte'yam je jyaay**

⁹Ntuknuja'yidu xa atse'e to'k je nak je jaanchja'vivatajk, ax ka'ats je'e ve'e je Diótrefes dumajapum vintso atse'e juu' nkats, chajkpts je'e ve'e jetse'e dunumájat joma ve'e je jaanchja'vivatajk ñay'amókajada.

¹⁰ Je'e kajx tse'e, pan najkxp ats mitse'e nku'ix, nvaajnpjap ats mitse'e je kyo'oy je'e juu' ve'e tyuump, vintso ve'e tyaaaya jets aatse'e xpakats. Ax ka je'e'jyap tse'e, ka'a tse'e dukuvuk je utsta je ajhta juu' ve'e jem je'ydup, ka'a tse'e duyakjaty jetse'e yakkuvajkjat je viijnk jayu, jetse'e dupavojpni joma ve'e je jaanchja'vivatajk ñay'amókajada.

¹¹ Mits, juu' atse'e ooy ntuntsajkp, ka'a tse'e xpanajkxut je kyo'oy je'e, je'e ve'e mpanajkxup je y'oy je'e. Pan pan tse'e dutoomp je y'oy je'e, y'ixats je'e ve'e je Nte'yam; ax pan pan tse'e dutoomp je kyo'oy je'e, ka'ats je'e ve'e je Nte'yam du'ixa.

Ku je Demetrio yak'oñukojtsi

¹² Anañujoma tse'e du'oñukótsada je Demetrio. Nay ve'empa

aats, mpaampapts aats je'e ve'e je tuvakojsun jets oy je'e ve'e juu' ve'e tyuump kyajtsp. Ax mnuja'vinupts mitse'e jets tyúvam je'e ve'e je tuvakojsun juu' aatse'e mpuump.

Ku je Juan kyojtskukajxini

¹³ Jepe'e may viijn juu' ats mitse'e kunjaa'ktuknuja'yi, ax ka'ats atse'e yap nak kujxp nja'ava'añ. ¹⁴ N'a'ixp xa atse'e jets tsojk ats mitse'e najkx nku'ix, ve'em tse'e nnakyojtsumjut aviinm ah'am.

¹⁵ Je Nte'yam tse'e myak'ijjinup je oy joot maat. Máyame'e je Dios mkejxuxjada pan pan jatye'e yaja nmaatnachojkumjudup. Máyame'e to'k aaj je Dios xmo'odat to'k jado'k pan pan jatye'e nmaatnachojkumjudup joma ve'e mits. Amén.